

# Koulousi

## Olo Iyoswo loso Poul A'amu Koulousi somne'no Mti'mokumentisofoho.

Olo Hungkuno Simo'mjofoho.

Jisas ahwomomne'no nto simentiso sohonta soswo *tiwenti-nain'nji* (29) *teti-wan'nji* (31) nto uyakolo'mentisopolikeno olo iyoswo loso Poul kako a'amu Koulousi somne'no mti'mokumentisofoho. Oso'no ango Koulousi hopo sopo ne'no a'amu 'Apousel' Sohwafe Syoho iyoswo somo Poul oso ango Koulousi sopo i'mofayo so'no mamti'mokinyofoho. Oso iyoswo mti'mokiyo hwapingoso olenoho. Ango Koulousi sopo a'amu *Nousitik* osohwa humunyoponoho. Oso a'amu hiso hofiko. Jisasimo iningkunyo Koulousinjo sofe simeho hi'ntnnonohino somo wonyo umokcontaningkofi Poul kako olo iyoswo loso hofikimo ito'no mihwajyo'ne mti'mokumentisofoho. Iyoswo homo lomjo hungkuno simo'mjoso olenoho. Jisas sohwo yo'mayo hopi'nonohino somo yakolo'nyo hweho. Olo iyoswo hiloso Poul kako ango Loum sopo impojoho yonto mti'mokumentisofoho. Oso'no nakwo olo hungkuno homo lomo atofo lihwasi tifi uningkohwano.

---

**1** 1-2 Ngko Pouli'ni Kilais Jisasiye hungkuno a'amumo  
uyohojiku'mofo (*apousel*) syoho'no hwo'nyoho. Anitu olo  
syoho loso'no kakoe huno mta'ni nihwosopo'mentisofoho. Ngko'nji  
neningkwa'wehwo Timouti'nji nekwo nohumentai olo iyoswo  
loso sekwo a'amu Koulousi sokune'no mti'mokalokuhwayo.  
Sekwo Anituye a'amu soku Kilaisimo simeho hi'ntnnono uyontifi  
kakine'no yokumpohn'nyo lohokwofo. Oso'no emo'ningkohoho.  
Naningkwohwo Anitu kako sekumo yo'mayo wopingo  
selohofihwosi sekwoe simeho pompenjiyo wosejapmmontonoho.  
Oso'no emo'ningkohoho.

**A'amu Koulousiso hofiko Anitumo simeho  
hi'ntnnono uyimentohofofoho.**

<sup>3</sup>Nekwo jomo ujoso engolopohamo nekwo sekune'no isamoyoka nakwoe Hwe Engo Jisas Kilaishiye Mpohune'no isamoyoka ulalokuhwoyo. <sup>4-6</sup>Hwapingoso sekumne'no hungkuno ole upo'nalokuhwayo. Hohonta simo'mo ne'mo Anituye hungkuno wopingo se'ma'mentiso sohonta sekwo haloho po'mentohofofoho. Yo'mayo wopingo Anitu sekumne'no selohofone so'no ahwomomo womantifeho. Oso'no sekwo Kilais Jisasimo simeho hi'ntnnono nehopi uyontifi Anituye hwe moy'a'mi hopi'nonohino soku sekwo simeho aka inalokwofo. Anituye hungkuno wopingoso se'ma'mentiso hopaso ango yawojo'meemo u'malofoho. Hungkuno wopingo loso upa'nontifi yahino wopingo yalokwofo. Sekwo oso hungkuno simo'mo upa'nimentohofeo sohonta Anitu sekumo sefo'mayo'ne so'no huno seyahoningki oso yahino wopingo somo ema'mentohofofoho. <sup>7</sup>Epeefilos sohwo kako Anituye hungkuno wopingo hiso losetihwamentiso so'no sekwo kakine'no huno seyohoho. Oshumo nekwo kakine'no simeho aka uyalokuhwoyo. Kako Kilaishiye syoho ulohofiyo wopingo hweho. Kako nekwo'nji syoho aka'nonohino hweho. Kako hofifiy efo'mawo'ningkiso sohwo Kilaisiye syoho somo wopingo mokosyohumawo'ningkohoho. <sup>8</sup>Anituye Towahuno Wopingo kako sekumo simeho aka inyo yahino wonyoangkafo sejapmmentiso so'no Epeefilos kako elimentisofoho.

**Poul kako a'amu Koulousi somne'no Anitu yokumpohn'nyo  
utofo'ne Anitumo jomo ulimentisofoho.**

<sup>9</sup>Oso hungkuno homo somo simo'mo upo'nontai nekwo oso homo somo Anitumo sekumne'no jomo ulomawo'ningkuhwoyo. Olo so'no jomo ulalokuhwayo,

Anitu sekwo yo'mayo ifitnne'ento limentisoso sekwoe hunomo womehu'meesesyono.

Anituye Towahuno Wopingo sohwo kako nosefo'mahoningkuhosi sekwo Anituye yahino wopingo so'no huno wopingo tipemafikuji Anituye hunomne'no huno waseyimontonoho.

Oso'no jomo ulalokuhwoyo. <sup>10</sup>Oseso yo'mayo yahino wopingo nakwoe Hwe Engo hi umo'none somo sekwo iningkafijoso sekwoe yahino humayoso kakoe simeho wopingo umokantifeho. Yo'mayo syoho sekwo ifijoso ne umo'nimontonoho. U sekwo Anitumne'no huno seyososo oso hunoso engo umo'nimontonoho. <sup>11</sup>Olo so'nji sekumne'no jomo ulalokuhwoyo. Nakwoe Hwe Engo sohwoe yokumpohn'nyo wonyoangkafo kako yokumpohn'nyo setofihwoso'no sekwo yokumpohn'nyo lohofikuji yo'mayo tango se'mahwoso'no sekwo simeho

wopingo'nji wohumantifeho. <sup>12</sup> Oseso simeho wopingo'nji nohumafikuji naningkwohwo Anitumo isamoyoka ulantifeho. Hwapingoso kako kakoe mehomí somne'no yo'mayo wonyoangkafo ulohofoneso mapitnne'ento imentisoso sekwo mayoso hoponoho. Oso hiso Anituye a'amú hopi'nonohino hn'nwi pomponahopo humalohwone hn'nwi nakwo womantanoho. <sup>13</sup> Hohonta mewoso sohwafe kaningkwohwo Seten kako sikwo'mjoho'mo yokumpohn'nyo nemokosyohumamentisofoho. I olahonta Anitu kako kakoe Hwomu anga'nohino sohumne'no umo'halokunjo sohwoe temtitofomo menehumaji'mentiso hn'nwi pomponahopo humalohwono. <sup>14</sup> Honingkano wonyoso nakumo nokilo'mokomokonesyoh umentaningki Anituye Hwomu Jisas kako nakwoe honingkano wonyoso wae enaofonto nakumo isihutofonema'mentisofoho.

**Kilais kakoe yahino'nji syoho ntnne hungkunofoho.**

<sup>15</sup> Nakwo Anitu sohumo muhwonyo'njo iwo'ningkuhwone sohwo kakoe Hwomu Kilais a'amú uhwonimentohoho sohwo kako Anitu'nji nihi'no afafoho. Anitu kako nakwoe hwaho yo'mayoso mamti'mokumentiso sohonta Jisas Kilais kako humamentisofoho. <sup>16</sup> I Anitu kakoe Hwomumo ulahoningki Kilais huhwo sohwo yo'mayo ahwomomjo hwahoponjo kako mti'mokumentisofoho. Yo'mayo uhwoniwo'ningkuhwone so'nji yo'mayo muhwonyo'njo iwo'ningkuhwone so'nji kako mti'mokumentisofoho. Kako Seten'nji kakoe towahuno wonyo sohwanji mti'mokumentisofoho. Kako a'amú ahwomomjo sohwamo mokosyohumayo sohwanji a'amú hwahoponjo sohwanji mti'mokumentisofoho. Yo'mayo hopi'nonohino mti'mokumentisoso Anitu kako Kilais kakimo enjwa'mo ho'nahumentisofoho. <sup>17</sup> Yo'mayo mti'mokumentisoso kako hwapingo hweho. Kakoe yokumpohn'nyo'nji yo'mayoso huli'mokomokosyohumawo'ningkiso hweho. <sup>18</sup> Nakwo kakine'no iningkawo'ningkuhwone so'nwi kakoe a'apaho'nwoho oso'no Jisas nakwoe hwe mnokino engo'njo hweho. Nakwoe songo humayoso kako hwapingo hweho. Kako poyo pe'ningkahoningki Anitu kakimo nihi'no si'momo ne'mo ulika'mentiso so'nno kako yo'mayo hopi'nonohino somo uyakolofonto mokosyohumayo hweho. <sup>19</sup> Anitu kako kakoe Hwomu Jisasimo uhwosopo'mentisoso nje huno nje humayoso kako hopi'nonohinoso womano lonto uyimentisofoho. Ose uyimentisoso Jisasi'nji kaningkwohwo Anitu'nji sikoe humayo nihi'no afafoho. <sup>20</sup> Yo'mayo ahwomomjo so'nji hwahoponjo so'nji Anituye mangohwa imo'nimenti'hwon'i'nwoho. I oso'no nakwo Anituye mango sohwana'nimne'no Anitu kako simeho afu unano lahoningki Jisas kaningkwohwoe hunomo iningkowahoningki iyo hwojiyafiku'nnyo somo a'amú sohwa Jisasimo fonjinto'fosyahoningkofi Jisas kakoe honiyo usihuma'mentiso so'nno Anituye simeho pompengo ifisyimo'mentisofoho.

Oso'no Anitumo u'mayo'ne honingkanoso nakumne'no hwosampo'mentisofoho.

<sup>21</sup> U sekwo soku hohonta sekwo huno wonyo'nji nohumantifi honingkano wonyo imotofo so'no Anituye mango sohwasi Anitu'nji mohummamotofo kuyoho. O'o sekwo ikanopo humamotofo kuyoho. <sup>22</sup> I olohonta Anituye hwomu sekumne'no poyo pe'nimentiso so'no Anitu kakoe a'amu ne kako'nji mokotiku'nyo'ne mesehumati'mentiso kuyoho. Oso'no Anitu sehwosopo'mentiso soku kakiyepono ipesemotasihwosi osopo sekwo honingkano wonyo ane'njo wohumantifeho. Sekwo Anituye simanopo lohofikuji wonimango masenonehoho. <sup>23</sup> I sekwo syoho ole fiyimno, Anituye hungkuno ne somo sekwo simeho hi'ntnnono uyikuji kakoe honingkanomo yokumpohn'nyo fikemokosyalohopmno. Yo'mayo hwahoponjoso honingkano hwasyomo ipesomotaweloho. O'o, yo'mayo hungkuno wopingo upa'nimentohofo somo nusikwajikutoho. Hungkuno hiloso a'amu hopi'nonohino olo hwaho lopo humalofo sohwamo u'mayo'nefoho. Ngko Pouli'i ni olo hungkuno wopingo homo losomne'no syoho ulohofiyi hwo'nyoho.

### Poul kako a'amu Koulousi somo ufo'ma'mentisofoho.

<sup>24</sup> Ngko sekumo sefo'mayo'ne tohino malokwe so'no simonyo yalokweno. Hwapingoso sekwo Anitumo iningkawo'ningkohoho soku sekwo Kilaishiye a'apaho fehohnjo kuyoho. Kilais kakoe a'apaho hn'nimo humaso so'no nakwo a'amumo ufo'mayone tohino malokuhwone so'no Kilais huhwo tohino malofoho. Oso tohino Kilais malokunjoso ngko moi'wo esojwafo'neso ufo'malokweno. <sup>25</sup> Anitu kakoe a'amu ne sokune'no syoho esotihwayo'ne nihwosopo'mentiso hwo'nyoho. Oso'no sefo'mayo hiso'no kakoe hungkuno hopi'nonohinoso wolosetihwamne'no yohono. <sup>26</sup> Hohonta olo hungkuno hiloso nihi'no hiyaso'mo wo'mojo so'no a'amu simo'mo ne'mta'ango hopi'nonohinoso mupa'nimmentohofofoho. I olohonta Anituye a'amu ne sohwamne'no olo hungkuno hiloso utiwha'nyopo nto i'mofapohoho. <sup>27</sup> Olo hungkuno hiyaso'mo wo'mojo loso olenoho. Kilais kako sekwoe simehomo humaho. Oso'no hwangku sekwo Anitu'nji wonyoangkafopo humayo'ne sekwo hontohumalofo. Olo hungkuno wonyoangkafo loso a'amu Juta somne'nohini'maho. O'o, a'amu temtitifo hopi'nonohino soku upa'nifitnne'ento lonetihwamentisofoho.

<sup>28</sup> Oso'no nakwo Jisas Kilaisimne'no a'amu hopi'nonohino sokumo hungkuno yolo'nohini losetihwalokuhwono. I nakwo a'amu anga'no anga'nohino olo hungkuno loso huno hofiyi eholosasiyo'ne so'no huno pi'ningo engo syafisyiwo'ningkuhwono. Hwapingoso nakwo ole namo'ningkohoho. A'amu nihi'no hopi'nonohinoso hofiko honingkano wonyomne'no i'waho ikuji Kilaisimo iningkayo yahinoso engo imo'ningkuhwoso'no hofiko a'amu ne imo'ningkuji Anitumo

u'mapitnne'entani syoho engo yalokuhwono. <sup>29</sup>Olo syoho tohohmtnno'njo yalokwe loso nje yokumpohn'nyo'nji'maho. O'o, Kīlais Jisas kako kakoe yokumpohn'nyo ntapmmentiso so'nji yalokweno.

**A'amu Koulousiso hofiko simeho hi'ntnnono yokumpohn'nyo  
uyikujo'no yo'mayo hungkuno hwasyo somo wae weemopife.**

**2** <sup>1</sup>Sekwo upa'nimno. Ngko sekumne'no a'amu Laoutisiyanta'ango sohwa hnnonji a'amu nom'ne nje simano manohonyo'njo imotofo sohwa hnnontnne'no syoho engo yalokweno. Syoho engo hiso olenoho. Mpohumo sekumne'no jomo engo ulalokweno. <sup>2</sup>Ole so'no nimo'ningkohoho. Sekwo yokumpohn'nyo ito'ningkuji simeho finimno. Sekwo Jisas Kilaisimne'no huno eholosahiningkuji Kīlais ne sohune'no huno waseyono. Anituye hungkuno hiyaso'mo wo'mojoso ololahifo. Kīlaisiyoho. <sup>3</sup>Yo'mayo huno wopingo hiyaso'mo wojoso wotipema'mo liso'manji u Kīlaisimo weho. Osohumta'ni wotipema'monnoho. Anituye huno mikunimposo hopi'nonohinosa Kīlaisimo ehuhnnawo'nyo hweho.

<sup>4</sup>A'amu filwo kako sekumo hwasyo hungkuno afofo'njo selihwoso'no sekwo mopiwasayo'ne olo hungkuno loso ngko yolohoso selalokweno. <sup>5</sup>Ngko sekwo'nji mohumayo hwo'nyoho. I oso'no u nje huno somo ngko sekwo'nji hopa humaleno. Sekwo Jisas hnne'no simeho hi'ntnnono engo uyontifi kakoe syoho hofijo yalokwofo so'no simonyo yalokweno.

**Nakwo Jisasimo ufohi'nontani songo ne'no  
humayo'neso nto ma'malohwono.**

<sup>6</sup>Kīlais Jisas sekwoe Hwe Engo imo'nimentiso so'no sekwo kako'nji hano femoyimno. Sīkuno huhwo huhwi yo'mayo se'maso so'no Jisas sefo'mayo'ne so'no fisyafihupmno. <sup>7</sup>Iyo kako hwahopo nta'ni afofo, mijo, yo'mayoso mawo'ningkiso pa'nyoso nakwo Jisas mta'ni yokumpohn'nyo nomehwasi nakwo iyo hopa engo imo'ningkuhwasi yokumpohn'nyo wolohofano. Oso pa'nyo nakwo hungkuno wopingo losetihwamentihwone somo simeho hi'ntnnono engo uyimno. Yo'mayo Anitu sekumne'no imentiso so'no sekwo isamoyoka ulikuji sekwoe simehomo engo weesemofihwono.

<sup>8</sup>A'amu hwasyo hungkunonji ifofo hungkuno'nji nomokokilo'mokokosesyohumanoho. Oso a'amu ose sohwa hofiko a'mane hungkuno'nji hwahoponjo hungkuno ntnne'no wolosetihwantife'no yohofo. Hofiko Kīlaisiye hungkuno masejofoho. Oso'no sekwo huno ito'no syafisyikuji sekwo i'waho nto'no fiyimno.

<sup>9</sup>Hwapingoso Anitu kakoe yokumpohn'nyo kakoe huno hopi'nonohinosa Kīlaisiye a'apahomo ehuhnnamo'nyofo. Kīlais kako a'amu hwahoponjo sofe a'apaho manto olipo humamentiso sohwo Anituyoho. <sup>10</sup>Oso'no sekwo Kīlaisi'nji humalofo soku Anitu

kakoe yokumpohn'nyo nto seloho'maho. Kīlais huhwo sohwo kako yo'mayo towahuno yokumpohn'nyo somo mokosyohumawo'nīngkiso hweho. <sup>11</sup> A'amu Juta sohwa nakwo Anituye a'amu hwona'nyoho lontifi a'apaho sihu kolo'nimotofo hwafoho. I oso'no sekwo Kīlaisi'nji humalofo soku sekwo Kīlaisiye yahino wopingoso a'apaho sihu kolo'nyo yahino somo uyohopo'mentohofofoho. Oso'no sekwoe a'apahomo makolo'nnyo kuyoho. O'o, sekwo huno wonyo so'nji honingkano wonyo so'njimo hotijwamo'nnyo hwasoho. Oso'no hwahoponjo yahino wonyo yokumpohn'nyo oso mta'ni Jisas kako sekumo isihutofosema'mentisofoho. <sup>12</sup> Mijo kiyomayo huyo'mango so'no wosyofisyano. Mijomo kesojisyasiyoso olenoho. Nakwoe honingkano wonyo somne'no Jisas pe'nimentiso hopa pe'nalokuhwono. I mijo mta'ni likafoso Jisasimō Anitu ulika'mentiso hopaso nakwo likofalokuhwono. Nakwo Anituye yokumpohn'nyo hisomo simeho hi'ntnnono uyalokuhwone so'no Anitu kako Jisasi'nji songo humayo'neso nelikofalofoho. <sup>13</sup> Hohonta sekwo sekwoe honingkano wonyo somo mohotijwaofe sohonta sekwo temtitifo kengo soku Anituye hungkunomo tifi miningkayo so'no sekwo Anitumo u'mayo'ne honingkanoso nihu'no awonoho. Osohonta Anitu sehonimentisoso sekwo honingkano wonyo somo humanitifi poyo pe'nīngkohofo hopa humentanīngkofi sehonimentisofoho. I ololahonta Jisas kakoe songo humayoso sejopahoningki Anitu songo semokonto sekwoe wonyo wae yasemo'mentisofoho. <sup>14</sup> Oso honingkano hungkuno Anitu Mousesimo uyimentisoso mokilo'mokosyohumanyo somo nakwo hwotoho hmmentīhwone so'no hungkuno hiloso sekwo wonyo kuyoho nalimojofoho. Yo'mayo honingkano wonyo nakwo imotohwoneso Anitu nomanto Jisasiye iyo hwojiyafiku'nnyo somo meho'nasyonto moi'wo imokumentisofoho. <sup>15</sup> Kīlais kako iyo hwojiyafiku'nnyomo poyo pe'nimentiso sohonta kako Seten'nji mewoso sofe yokumpohn'nyoso moi'wo imokumentisofoho. Anitu nje mango hwamo utihwa'nyopo uyakolofofeho ulahoningki Seten kako wonimango unimentisofoho.

### Nakwo Jisasi'nji poyo nto sape'nimentīhwonefoho.

<sup>16</sup> Anitu kako yo'mayo naloho'mentiso so'no a'amu sekumo wosopayo'ne u mijo'ne honingkano hungkuno selifijo'manji osomo sekwo tifi iningkakutoho. U sekwo yo'mayo wosopayo nyo'neso u Sikuno Engo somo muhwonyo'ne u hamno songo somne'no mosyafisiyo'njo sikuno iyoho humayo somo muhwonyo'ne oso'no yoka selifijo'manji sekwo osomo haloho upekutoho. <sup>17</sup> Hohonta oso yahino imotofoso swo'nohinoho. Tifi imo'none so'no netihwayo'nefoho. I ololahonta Kīlais kako poso sohwo yahino ne somo hwapingo hweho. <sup>18</sup> A'amu fihwo kako kakoe yofe monje poji yasyonto kako ahwomomjo a'amu sofe yofe ho'nomawo'nīngkiso so'no selihwoso'no u ngko wojo uhwonīngkoho

so'no ngko sekumo sehwofilo'nnyo hwo'nyoho. Ose seloso'manji sekwo oso hwoe hungkunomo haloho pekutoho. Oso hwe huhwo sohwo sekwo kakoe honingkanomo miningkayo so'no kako sitofo noselihwoloh. O'o kakoe a'apahomne'nohino syafisyiwo'ningkiso hwaho. Yokumpohn'nyo imo'niwo'ningkiso hwaho. <sup>19</sup> Oso hwe huhwo sohwo kako Kila'si  
nakwoe Hwe Engo sohomo mufohi'nyo hwaho. I nakwo Jisasi'mo  
ufohi'nyo hn'nwi nakwo kakoe a'apaho'nwaho. Kako nakwoe mnokino  
engo'njo hwaho. Nakwoe mnokino engo'njo huhwo sohwo kako kakoe  
a'apaho hn'nimo yokumpohn'nyo yano nejapiwo'ningkisoso nakumo  
mehuli'mokonasyiwo'ningkohoho. Oso'no kako kakoe a'apaho hn'nimo  
Anituye yokumpohn'nyo'nji huno wopingo'nji nejaponto sokafo  
nemokalofoho.

<sup>20</sup> Sekwo Kilaisi'nji sape'nimentohofo so'no Seten sohwo mewoso  
sohwanji hofiko sekumo yokumpohn'nyo mosemokosyohumafitnne'ho. I oso'no sekwo hohontajo honingkano hungkunomo iningkafijo so'no  
sekwo hofikimo enjwa'mo humalofo. <sup>21</sup> Olo honingkano hungkuno  
lomo sekwo peho'ne iningkowalokwofo. Sekwo yo'mayoso ahomo  
nomokosyohumafikutoho. Yo'mayo wosopayo noningkutoho. Yo'mayo  
somo nopm'mokukutoho. <sup>22</sup> Hungkuno hiso a'amu hofikoe huno  
mta'ni syafisyontifi loneti'hwalokwofo. Yo'mayo hwahoponjoso moi'wo  
umo'nimoto yalofoho. <sup>23</sup> A'amu oso honingkanomo iningkowalokwofo  
somo uhwonontani nakwo huno hwasyoso ole syafisyiwo'ningkuhwoni,  
U a'amu honingkano wopingo'njofoho. Hwapingoso hofiko hwomtame  
ehumantifi hofikoe yofe monje yasyontifi yo'mayo a'apaho umo  
lonteso monje yasyiwo'ningkohofofoho. I oso'no nakwo huno wonyo  
so'nji honingkano wonyo so'nji wae yafo'neso hungkuno hiso  
monefo'manehoho. O'o, nihu'no awonoho.

**Anitu kako Kilaisi'nji nakwo'njimo songo  
humayo'ne nelika'mentisofoho.**

**3** <sup>1</sup>Anitu kako Kilaisi'nji nakwo'njimo songo humayo'ne nelika'mentiso  
so'no nakwo Kilaisi'nji yo'mayo ahwomomjo so'ntnne'no  
yomohu'nyopo womeho'nosyano. Kilais nakwoe Hwe Engo sohwo yofe  
engo manto Anituye aho anga sohohnta'nji nemokosyohumayo'ne humaho.  
Nakwo kako'nji wohumantane'no yihwono. <sup>2</sup>Sekwo yo'mayo hwahoponjo  
somne'no huno syafisyikutoho. O'o, yo'mayo ahwomomjo somne'no  
fisyafihupmno. <sup>3</sup>Hwapingoso nakwo yo'mayo hwahoponjo somne'no poyo  
hopa pe'nontani songo humayo neso Jisasi'mo ufohi'ningkahoningkuhwoni  
Jisasi kako Anitumo ufohi'ningkahoningki Anitu kako wopingo  
nemokosyohumaho. <sup>4</sup>Kilais nakwoe songo humayo'neso ne hwaho. Kako  
utihwa'nyopo i'mofapihwoso'no sekwo kako'nji nohumafikuji kakoe  
yokumpohn'nyo so'nji yofe engo so'nji womantifeho.

**Olo hungkuno loso yahino yofoho so'nji songo ntnne'ne hungkunofoho.**

<sup>5</sup> Hwahoponjo yahino wonyo simeho mo'mo mnonawojoso poyo wape'nono. Yahino wonyoso olenoho. A'mohufo, hungkuno wonyo, simeho fefoyo, huno wonyo, nom'ne a'amufe yo'mayo so'no hi namo'nyo, osenoho. A'amu nom'ne a'amufe yo'mayo so'no hi umo'noso sohwo kako yo'mayo ho.yangoso kako anitu pa'nyo umokonto kako oso humnophini iningkowalofoho. <sup>6</sup> A'amu oso yo'mayo hwahoponjo yahino wonyoso iwo'ningkohoho somo Anitu kako simeho wonyo uyonefoho. <sup>7</sup> Hohonta honingkano wonyo hiso sekumo yokumpohn'nyo semokosyohumentaningki sekwo soku yo'mayo wonyoso imotofo kuyoho.

<sup>8</sup> I oso'no olohonta sekwo yahino hopi'nonohino loso foho'naopmno. Simeho wonyo, yoka, sitofo, oso foho'naopmno. I sifajo'nji wonyo hungkuno so'nji sekwoe mango mta'ni noswapihwoloho. <sup>9</sup> Sekwo hwasyo hungkuno a'amu so'nji nohnningkutoho. O'o, yo'mayo yahino wonyo imotofo somo nto ho'nao'mentohofofoho. <sup>10</sup> Oso'no sekwo a'amu songo imo'nimentohofofoho. Oso a'amu songo imo'halokunjoso Anitu kako hwapingo hweho. Sikuno huhwo huhwi Anitu kako a'amu songo sokumo kakine'no huno wopingo sejaponto yahino songo'nji Anitu kako pa'nyo semokalofoho. <sup>11</sup> Nakwo Anituye yahino songo ma'mentihwone hn'nwi nakwo hinjohi'nwi af'a'ntwoho. I ole liwo'ningkuhwoni, A'amu temtitofo kengo kengo mta'ango hwafoho. U hungkuno kengo'njo hwafoho. U Jutafe honingkano hungkunomo iningkuwu'ningkohofofoho. Honingkano hungkunomo miningkayo'njofoho. U a'amu we'mta'angofoho. U hameponjo a'amufoho. U a'amu yofe engo'njo hwafoho. U a'amu sakinjofoho. Ose liwo'ningkuhwoneso siki hungkunofoho. Hungkuno neso olenoho. Kilaiknakwoe songo humayoso hwapingo sohwo kako nakwo a'amu kengo kengo hn'nimo nonafohi'nonto kako nakwo hinjohi'nimo humaho.

**Nakwo hitoho inyo yahino somo uningkohwano.**

<sup>12</sup> Sekwo Anituye a'amu ne kuyoho. Kako sekumne'no hitoho ulofoso so'no kakine'no sehwosopo'mentisofoho. Oso'no sekwo kakoe yahino lomo tifi finingkamno. Sekwo a'amu hopi'nonohino somne'no hitoho selofihwoso'no hofikimo wopingo ulohopmno. Sekwoe yofe monje yasyikuji sekwo a'amu somne'no hwahopo pawomno. A'amu fihwa sekumo wonyo selohopijoso sekwo simeho wonyo uyikutoho. O'o, sekwo simeho wopingo uyimno. <sup>13</sup> Sekwo a'amu so'nji fo'ma'nimno. U a'amu fihwa nom'ni hwamne'no simeho wonyo umo'noso so'no sekwo wonyo homo somo hohujwo'mo meho'naopmno. Nakwoe Hwe Engo sohwo nakwoe wonyo wae enao'mentiso oso pa'nyoso nakwo nom'ne hwafoho wonyo so'no hohujwo ukinjaofano. <sup>14</sup> Yahino wonyoangkafo

selohe so'nji nom'ne yahino anga'nohino nom'ne somo hwofilo'nnyo so'nji ufohi'nimno. Oso simeho inyo yahino so'nji ufohi'nimno. Simeho inifijo'manji simeho af'a'no wonyoangkafo'no wohumantifeho.

<sup>15</sup>Kilais kako simeho pompenjiyo nejapiwo'ningkiso sohwo nakumo yokumpohn'nyo wonemokosyohumano. Kilais kako nakwoe a'apaho anga'nohino pa'nyo simeho pompenjiyo'nji humayo'ne so'no nakumne'no joho nalimentisofoho. Oso'no sekwo soku sikuno huhwo huhwi kakimo isamoyoka uliwo'nimno. <sup>16</sup>Kilaisiye hungkuno wonyoangkafoso sekwoe simeho mo'mo nomafikuji huno wopingo sejapihwosi yo'mayo iwo'ningkohofo somo uehu'mokasesyono. Ose ifijo'manji sekwo Kilais mta'ni huno wopingo tipemafikuji sekwo filutihunimno. Honingkano wopingo somo mihwatnnimno. Ose ifijoso sekwo Anitumne'no simeho wopingo semo'ningkuhwoso'no sekwo Anituye hungkuno'njo Ta'njo Iyoswo ta filimno. Oso'nji tajo angomjo ta so'nji ta nom'neso Anituye Towahuno sejapeso Anituye yofe ho'nomayo'ne filutihunimno. <sup>17</sup>Sekwo yo'mayo hungkuno wolano likuji ou syoho uyano likuji sekwo Jisasi'nji ejoku'nohumafikuji sekwo Mpohwo Anitumo isamoyoka ulikuji yo'mayoso nakwoe Hwe Engo Jisasiye yokumpohn'nyo'nji fiyimno.

#### **A'mu somontohwa Anituye simeho wopingo umokiyo'ne yahinofoho.**

<sup>18</sup>Sekwo moy'a'mi sofasi sekwoe hwehwamne'no hwahopo pawomno. Hofikimo enjwa'mo fosyohumamno. Hofikoe hungkunomo haloho ito'no popmno. Oso yahino nakwoe Hwe Engo moy'a'mi sofa hofiko ifitnne'ento imentisofoho.

<sup>19</sup>Sekwo hwe sohwasi sekwoe moy'a'misafamne'no wasemo'nono. Sekwo simeho wonyo semo'ningkuhwoso'no ape sofamo yoka hungkuno nulikutoho. O'o, hungkuno hofiy'o'nohino ulimno.

<sup>20</sup>Sekwo mehom i soku, seningkwohwo sena'wohijafe hungkunomo sikuno huhwo huhwi haloho popmno. Ose ikujo'no Anitu kakoe simeho wopingo umo'nimontonoho.

<sup>21</sup>Sekwo homningkwohwosasi homna'wohijasi sekwoe mehomife simeho wonyo umokukutoho. Oso hwapingo hiso ole, yoka, sitofo, sifajo hungkuno uliwo'ningkutoho. Yo'mayo ulohofikujo'no hofiko simeho tohino umningkuhwoso'no honingkano wonyomo wowantifeho.

#### **Syoho ulohofiy'o so'nji mokosyohumayo sohwanjiye hungkunofoho.**

<sup>22</sup>Sekwo syoho ulohofiy'o soku, sekwoe hwe engo sohwafe hungkunomo tifi finingkamno. Sekwoe syoho somne'no wasemo'nono. Syoho homo somo semokosyohumayo sohwo kako nosehoningkahoningki syoho yokumpohn'nyo iwo'ningkohofo oso pa'nyoso ne'no fiyikuno. Hwapingoso sekwo Anituye yofe ho'nomayo'ne syoho yalokwofo.

<sup>23</sup>Yo'mayo hopi'nonohino uyano likuji simo'mo ole fisyafihupmno. Olo

syoho we'e loso a'amumne'no miyalokuyihwono. O'o, nakwoe Hwe Engo Anitumne'no yalokuhwono. Ose syafisyikuji syoho yokumpohn'nyo fiyikuno. <sup>24</sup>Sekwo iningo seyihwoloh. Nakwoe Hwe Engo Anitu sohwo sekwoe syoho yo'mayo so'no ho'yango ne sejaponefoho. Oso ho'yango neso Anitu nto hwosopeehumentisofoho. Sekwo Kilaisiye syoho ulohofiyi soku kako sekwoe Hwe Engo hweho. <sup>25</sup>A'amu fihwo kako wonyo yoso'manji kako tohino nomanefoho. Nakwoe honingkano wonyomne'no Anitu kako tango monejape'njo iyoso'no afofo hungkuno mulanehwono.

**4** <sup>1</sup>Sekwo hwe engo syoho selohofiyi sohwamo mokosyohumawo'ningkohofo sohwasi, sekwo huno ole seyozi, Sekwoe Hwe Engo ne sohwo ahwomomo nohumanto sehonalofoho. Oso'no sekwo a'amu nomokosyohumawo'ningkohofo sohwamo yahino wopingo'nohini ulohopmno.

### Olo yahino lomo finingkamno.

<sup>2</sup>Sekwo Mpohumo jomo ujo so'ne yahino somo yokumpohn'nyo fikesyohumamno. Sekwo Mpohumo jomo ulano likuji simo'mo huno nto'no syafisyikuji Mpohumo jomo ulikuji isamoyoka ne'nohini ulikuno. <sup>3</sup>Sekwo Anitumo nakune'no nefo'mayo'ne jomo ulimno. Olo so'no ulimno. Anitu kako kakoe hungkuno lutihwayo'ne honingkano wonamofiyono. Olo hungkuno hiloso hwapingoso Kilaisiyoho. Hohonta hungkuno hiloso hiyaso'mo wentaningki Kilais ehontojwahumentisos olohonta ngko hungkuno hiloso a'amu somo lutihwahoningko a'amu fiso nakwolaho lontifi impo'angomo intofanihumentohofofoho. <sup>4</sup>Oso'no olo hungkuno Kilais ehontojwahumentiso loso ngko a'amumo nto'no lutihwayo'ne sekwo ngkine'no Mpohumo jomo ulimno. Olo syoho Anitu ntapmentiso loso ngko a'amufe huno somo ito'no eholhosasiyo'ne Mpohumo jomo ulimno.

<sup>5</sup>Nakwo olo hwaho lopo siki humayo'ne'maho. O'o, nakwo Anituye syoho ulohofiyi'nohoho. Oso'no sekwo nom'ne a'amu Anitumo iningkawo'ningkohofo so'nji nohumafikuji sekwoe yahino somne'no huno ito'no syafisyikuji Anituye honingkano wopingo utihwamno. <sup>6</sup>Hungkuno ulikujo'no siki hungkuno so'nji wonyo hungkuno so'nji nolikutoho. O'o, Anituye hungkuno nto'nohino esyohumafikuji huno wopingo tipemafikuji hungkuno hofiyi'nohini filimno. Ose ifijoso a'amu sekumo yo'mayo hungkuno selohoningkujo'no sekwo aku hungkuno ito'nohino ulimno.

### Poul kako Tikikosi'nji Ounesimosi'njimo lihwatimentisofoho.

<sup>7</sup>Tikikos sohwo kako nose'mahwosi nje hungkuno yo'mayo so'no sejo'ne hweho. Kako Anituye syoho so'no hi umo'ningkahoningki nakwo'nji syoho yalofoho. <sup>8</sup>Oso'no ngko Tikikos sekuyepono uhwojalokweno. Kako yo'mayo ne'ma'maso so'nji selihwosi sekumo yokumpohn'nyo

wasesosofito'montonoho. <sup>9</sup>Nekwo Ounesimos huhwo'njimo sekuyepono lihwojalokuhwoyo. Tikikosi'nji siko nose'mahosisi yo'mayo olopo ne'ma'maso so'no wolosetihwanjiyoho.

**Poul kako a'amu Koulousi somo nje a'amu kuyoho ulimentisofoho.**

<sup>10</sup>Alisitakos sohwo impo'angomo ngko'nji humantihwoyo sohwo kako nje a'amufo selalofoho. Mak, Mponopasiye koningkwa'wehwo kako huhwo'nji nje a'amufo selalofoho. Mak huhwo sohwo sekuyepono se'maso'manji nto selimale hopaso sekwo kakimo utimafikuji hofiyi mokosyohumamno. <sup>11</sup>A'amu nom'ne Jisas Jasitos kako huhwo'nji nje a'amufo selalofoho. Oso a'amu Jutafe temtitifo mta'ango hufa'u sihune sohwa hofiko Anituye yo'mayo hopi'nonohinoso a'amumo yokumpohn'nyo enemokosyohumayo'ne syoho engo yalokuhwono. Hofiko wonyoangkafo nifo'malokwofo.

<sup>12</sup>Nom'nehwo Epeefilos sekwoe angoponta'ango huhwo'nji nje a'amufo selalofoho. Kako huhwo Kilaia Jisasiye syoho ulohofiyi hweho. Sikuno huhwo huhwi kako sekumne'no Mpohumo jomo uliwo'ningkiso hweho. Ole uliwo'ningkohi, Anitu sohwosi, kiko a'amu Koulousi somo hofiko kikine'no yokumpohn'nyo lohofo'neso kiko ufo'maho. Hofikimo yokumpohn'nyo engo umokohojo'no hofiko sokafo umo'nife. Jije huno hopi'nonohinomo hofiko huno uyihwoso'no osomo tifi wokiningkapife. Epeefilos Anitumo jomo ose uliwo'ningkisofoho. <sup>13</sup>Ngko sohwo'n'i Epeefilos sohumne'no huno ole niyohi, Kako a'amu Laoutisiyanta'ango sokunonji Hiyelapoulisnta'ango sokunonji sekwo sokunontne'no sefo'mayo'ne syoho engo yalofoho. <sup>14</sup>Luk sohwo hwe uyohofaho syoho wonyoangkafo iwo'ningkiso sohwo'nji Ntemasi'nji siko nekwoe a'amufo selalokusivo.

<sup>15</sup>A'amu Laoutisiya mta'ango Anitumne'no iningkawo'ningkohofeo somo nje a'amufo ulalokwe so'no sekwo ulimno. Nom'ne a'mu Nimifa'nji a'amu kakoe angomo Anitumne'no uhu'mokuwo'ningkohofeo so'njimo nje a'amufo ulalokwe so'no ulimno. <sup>16</sup>Olo iyoswo losomo sekwo atofo losojwaoфikuji a'amu Laoutisiya hofiko Anitumne'no uhu'mokuwo'ningkohofeo somne'no uyimno. Hofiko atofo walife. Nom'ne iyoswo a'amu Laoutisiya somne'no uyahotimaleso hofiko nosejapikujo'no sekwo hoku atofo filimno. <sup>17</sup>Sekwo Akiposimo ole ulimno. Oso syoho Anitu kijapmmasoso kiko ito'no esyohumahoji ne'njo fiyohoho.

<sup>18</sup>Olo iyoswo simo'mjo semti'mokiyoheso nom'ne a'amumo ulahoningko mti'mokohoho. I olo hungkuno ae'uyo loso ngko Pouli'nji nje aho'nji mti'mokalokweno. Nje a'amufo selalokweno. Sekwo ngko impo'angomo humale so'no iningo nimofikutoho. Anitu kako yo'mayoso wopingo waseloho'montonoho. Ngko Pouli'nji mti'mokalokweno. Osohopeho.